

Tutu é kuvi ūun e táxnūu San Juan

Ña é k̄ata'xi ntuvi iña ko

¹ I'a ntaa ntí ni ntō iñá Cristu, ña é dukuān tuvi dá iñi ntu'u ñuxiví sa. Tēkú nti iña ñá ne, iní nti ña nuu mií nti di. Īto nteé nti ña ne, tiin nta'ā ntí ña di. Ña sá'ā ne, ña é k̄aka'an o e Tú'un Xuva kō, ña e tá'xi ntuvi iña ko. ² Tsi tá'xi Xuva kō é k̄iní nti ña kata'xi ntuvi iña ko. Īnī nti ña ne, kaka'án nti ni ntō é nuu é ntaā i iña ña. Kaka'án nti ni ntō ve iña ña'a san, ña kata'xi ntuvi iña ko é ña kantí'i. Tsí dukuān tuví ña ni Xuva kō nte ntúvi dí'na ne, tá'xi Xuva kō é k̄iní nti ña. ³ Kaka'án nti ni ntō nee iña é ini ntí, nee iña e téku ntí, vata koo é kuédadii tsi nima nto ni ntí vata tsi ó e kuédadii tsi nimá nti ni Xuva ko ni I'xā ñá Jesucristu. ⁴ Sá'ā é k̄aka'u ntí iña ntó vata koo é kuntōo díni kue'en ntó nī nti.

Ñá te nēé te nīñú Xuva kō

⁵ Tú'ūn sa'á nañé'e Jesucristú nti ne, kaka'án nti ni nto vē. Vá'ā kue'en Xúva kō. Ña túvi nee iña é k̄ini kaa iña ña. ⁶ Tē ntáka'an o tsí dadii tsi o ni ñā ntá tsi ntáde o é k̄ini kaa ne, ntáka'an ó dovete; ñá tē nuu é ntaā i e ntáde o é vatā ó ntio Xuva kō. ⁷ Ntá tsi te vīi o é vā'á vatā ó de Xuva kō ne, kuédadii tsi nima ko ni ta'an ko un ntíi ntīi o. Kidáa ne, níñi I'xā ñá Jesucristu kanakate kuétsi kō.

⁸ Te k̄a'an o tsí ña tuvi kuétsi kō ne, ntaéni nta'ví mii ō kúñu kō. Ñá ntántikin ntí'xe o itsi Xuva kō. ⁹ Te k̄a'an o ni Xuva ko tsi iō ntí'xe kuétsi kō ne, ini o tsi vií ña é vā'á ne, kada ka'nu iní ña ni ko kuétsi kō. Nakate ña nima ko é un ntí'í é k̄ini kaa san. ¹⁰ Te k̄a'an o tsí ña tuvi kuétsi kō ne, vata tē ntáka'an o tsí vete Xuva kō. Ña ntákuinti'xe ko tū'un é k̄aka'an ña.

2

Kanada'ān Cristu ko

¹ I'xá mii ko, i'a kaka'an u ni nto sá'a vata koo é ña víi nto é kīni kaa. Ntá tsi te víi o é kīni kaa ne, ió xoo é nada'an i kō nuu Xuva ko. Jesucristu ñá ne, vá'ā kue'én ña. ² Tsi ntá'vi Jesuu iña kuétsi kō da éti ña niñi ña ntíkā krusi kan. Ñá te da mii tsi iña kuétsi mii kō, tsí iña kuétsi e ntáde un ntíí ntíí ña ntoo ñuxiví sa.

³ Kutuni ko tsí ini ntí'xe o Jēsuu te ntáde ntaa o é kākā'an ña é víi o. ⁴ Xoó ña'a é kākā'an ña tsí ini ñá ña, ntá tsi ña káde ntaa ña é kākā'an ñá ne, da mii ku'e'en tsi é kākā'an ñá dovete. Ná ini ka'an ña é nuu é ntaā i. ⁵ Ntá tsi xoo ñá'a é káde ntaa ña é kākā'an Xúva kō é víi ó ne, kakuinima ntí'xe ña Xuva kō. Dukuan o kútuni ko te i'xa é káduku ntée ntí'xe Xuva kō. ⁶ Xoó ña'a é kākā'an ña tsí uun tsi nima ñá ni Xuva kō né, na víi ña é vá'á vatā o dé Jesuu.

Tū'ún xee é kākā'an Xúva kō é víi o

⁷ Ntō'o, tá'an ko e dóo ntio ko, ñá te nūu i é xee san é kākā'an ntí ni ntō. Kaka'an xtúku ntí ni nto nūu i é ini nto nte ntúvi dí'na. Tū'ún san e téku nto kídaā ne, sá'a kākā'an xtúku ú ni ntō. ⁸ Ntá tsi i'a kade vá'a ú uun tú'ún xee é nuu é ntaā i iñá Cristú ne, iña ntō dí. Tsí kaita nti'xin é kīni kaa san tsi é xee nuu i é nuu é ntaā í, vatā ó kaita nti'xin é nēe san dá kākene ngántíí san.

⁹ Te iō ntó ntáka'an ntó tsi ntaíka nto mí kāxi'í ne, ntá tsi ntákune'u iní nto ni tā'an nto ne, vata te ntaíka dukuan ntō mí é nēe. ¹⁰ Xoo e ntákuinima í ta'an í ne, vata tē ntoo ña mi é kāxi'í. Ná ntio ká ña víi ña nuu i é kīni kaa. ¹¹ Ntá tsi xoo e ntákune'u iní i ni tā'an í ne, vata te ntaíka dukuan ñā mi é nēe. Ña ini ña nté koo víi ña, tsí vata tē ña kaxí'i nuu ña mí'i kī'in ña, tsi dóo nee.

¹² Kaka'an u ni nto, i'xa, tsi e dé ka'nu iní Xuva ko kuétsi nto tsí xi'í Jēsuu kuénta iña nto. ¹³ Kaka'an u ni nto, ūva, tsí ini nto ña é tuví dí'na da iñi ntu'u ñuxiví sa. Kaka'an u ni nto, na kuétsi, tsi e kúvi idé nto ni tó'ō e ña vá'ā san.

Kaka'an u ni nto, i'xa, tsí ini ntó Xuva kō. ¹⁴ Kaka'an u ni nto, ūva, tsí ini nto ña é tuví dí'na da itúvi ñuxiví sa.

Kaka'án u ni nto, na kuētsi, tsi dóo iō ntíi ntō, tsí ini va'á nto tú'un Xuva kō ne, e kúvi idé nto nī tó'ō e ña vá'á san.

¹⁵ Ñá ku kuinīma ntó nuu i é kīni ntáa san é iō ñuxiví sa; ntē ña ku dé kuení nto é vii nto é kini kaa vatā ó de ña'a, ña é ña ntákuinti'xe i san. Xoo é kákuinima í nuu i é kīni ntáa san é iō ñuxiví sa ne, ñá kákuinima ñá Xuva kō. ¹⁶ É un ntí'i nūu i é kīni ntáa é iō ñuxiví sa ne, ñá te nta'a Xuva ko vē'xi, tsí i'a tsi kíi mii ñūxiví sa. Nee iña é ntio nima kīni kaa ko, nee iña é kīni kaa é koto ō, nee iña é kāde i é vii o e dóo ka'nu ña'a o ne, sá'ā é káta'xi ñuxiví sa. ¹⁷ Kué'en kánti'i ñuxiví sa nī é un ntí'i nūu i é kīni ntáa. Ntá tsi xoo ñá'a é kāde ntaa ña é ntio Xuva kō ne, kutuví ñá ni Xuva ko ntii dañu ntúvi.

Nee é nuu é ntaā i ne, nee é dovete

¹⁸ I'xá mīi ko, dokó sa ntí'i ñuxiví sa. Tēkú nto tsí ki'xi uun ña'a, ña kada ne'u iní nī Cristu. É tētín ña xée ñá ve. Dukuān ne, kutuni ko tsí dokó sa ntí'i ñuxiví sa ve. ¹⁹ Ña kuān ntáa sán ne, kīi nteé xio ña kō, é dadíi ika o ni ña, tsí ña te kuédadíi nima ñá ni kō. Tē dí uun tsi nima ñá ni kō né, kuan tsí o ntaíka dadíi o ni ña. Ntá tsi kīi nteé xio ña kō vata koo é tidito tsí ña te iña ko ña é un ntí'i ña.

²⁰ Ntá tsi Jesuú ne, tā'xi ña Espíritū Sántū é kunūu ña nima ntó vata koo é kūtuni ntó nee iña é nuu é ntaā í iña ña. ²¹ É kuān ó kaka'u ú ne, ñá te kaká'án u é ña iní nto nee iña é nuu é ntaā i, tsí ini vá'a nto. Da nēé ka dovete ne, é iní nto tsí ña te nuu é ntaā i. ²² ¿Xoó ntu e dóo vete í? ¿Ñā ntu te ña é káka'an tsí Jesuú ne, ña te dívi ñā é taxnuu Xuva kō? Ña kuān ntáa sán ne, kade ne'u iní ña nī Cristu, tsí kaka'an ña tsí ña te nuu é ntaā i é dadíi Xuva ko ni I'xā ña. ²³ Xoó ña'a é káka'an ñá tsi Jesuú ne, ña te dívi ñā é taxnuu Xuva kō ne, ñá iní ña xoo é Xuva kō dí. Ntá tsi xoó ña'a é káka'an ñá tsi táxnuu ntí'xe Xuva ko I'xā ñá Jesuú ne, iní ñá Xuva kō dí.

²⁴ Dukuān né, xnūu nto nima nto tú'ūn e téku nto dí'na. Te naka'an ká nto tú'ūn sa'á ne, kúvi uun tsi nima ntó ni Xuva ko, ni I'xā ña. ²⁵ Jesucristú ne, xé'e ñā xu'u ña tsí ta'xi ña ntuvi vā'á iña ko ntii dañu ntúvi.

²⁶ Kaka'án u ni nto s̄a' tsí iō ñá'a é ncho kani nta'ví ña nto. ²⁷ Ntá tsi é n̄i' i nto Espíritū Sántū sán ne, ñá kantio é nakuá'a tuku ña'a nto. Tsi e tá'xi Jesūcristu Espíritū Sántū sán ne, ðivi ña kanañē'e ñá nto é un nti'ī. Ná tē dovete kaká'an ñá ni ntō, tsí nuu é ntaā i. Kuntoo dadii nto nī Cristu, vātā ó kanañē'e Espíritū san nto.

²⁸ Kaka'án u ni nto ve, ī'xá ko, te kuntoo dadii nto nī Cristu vata koo é tē ntii díto ña ne, kunteē ini ko ña, ñá te kūka'an nuú ko ña tē xee ña kídaā. ²⁹ Ini ntó tsi dóo va'á Xuva kō. Dukuān né, da xōó ka ña'a é kāde ña é vā'á ne, ðivi ñā é ī'xá nti'xe Xuva ko ñā.

3

I'xa e ntáduku ntée Xuva kō

¹ Koto nto nté ntu kaa dii kakuinima Xúva ko kō, tsi tá'xi ña é kuvi o i'xā ñá ne, i'xá nti'xe Xuva kō kúvi ō. Nā é ña ntákuinti'xe i Xuva kō ne, ñá ini ñá xoo ñá'a o, tsí nte ñá ini ña xoo é Xuva kō ði. ² Ntō'o tá'ān kó e dóo ntio kó nto, é ī'xá Xuva kō kúvi o vevíi ne, vāta kutūni kó nee iñá ntu ntuvi o ve tē kúvi, ntá tsi ini o tsí te ntii díto Jesuú ne, ntuvi o vata kaa ña ði. Tsí kídaā ne, kini o ña nté kaa ña. ³ Un ntíí ntíí ña'a, ña ntantétu Jesuú ne, ñá víi ka ña é kīni kaa, tsí Jesuú ne, dōo va'á ña ne, ña túvi kuétsí ña.

⁴ Un ntíí ntíí ña'a, ña é ncho vii kuetsi sán ne, ña ntáde ntaa ña é kākā'án lei iñā Xuva ko. Iō kuetsí ko tē ña ntáde ntaa o é kākā'án lei san. ⁵ Ini ntó tsi vé'xi Jesuú vata koo é nakuitā ña kuétsi kō. Jesuú ne, ña túvi kuétsí ña nté un siin. ⁶ Xoó ña'a, ña é kanuu iní i ña ne, ña ncho víi ka ña é kuétsí san ði. Xoó ña'a, ña é da mií é kāde kuétsí sán ne, vāta kinī ñá Jesuu. Ntē ñá ini ña xoo é Xuva kō ði. ⁷ I'xá mií ko, ñá kū da vá'a nto é kāni nta'ví ña'a san nto. Xoó ña'a, ña é kāde é vā'á ne, vā'ā nti'xe ña vata kaá mii ñā. ⁸ Ntá tsi xoo ñá'a, ña é kāde kuétsí sán ne, kaduku ntée ña e ña vá'ā san. Tsí nte dí'na ede tó'ō e ña vá'ā san é kīni kaa. Dukuān é vé'xí I'xá Xuva ko ñūxiví sa vata koo é nantí'ī ña nuu i é kāde tó'ō e ña vá'ā san.

⁹ Xoó ña'a é nakáku Xuva kō ne, ñá ncho víí ka ña é kīni kaa, tsí nuu Xuva kō nima ña. Ña kúvi víí ka ña é kīni kaa, tsi é nakáku ña nta'a Xuva kō. ¹⁰ Dukuān ne, kutuni ko neé i'xa é kāduku ntée Xuva kō ne, neé i'xa é kāduku ntée tó'ō e ña vá'ā san. Xoó ña'a é ña káde é vā'á ne, ñá te i'xa é kāduku ntée Xuva kō. Nté ña'a, ña é ña kákuinima í ta'an i ne, ñá te i'xa é kāduku ntée Xuva kō.

Kuinima kó ta'an kō

¹¹ Sá'a tū'un e téku nto nte ntúvi dí'na: é na kuīnima kó ta'an kō. ¹² Ñá víi o vata o dé Caiin, ña é ede é kīni kaa san, tsí é'ni ña ení ña. ¿Nté kui é'ni ntu ña ení ña? Tsí Caiín san ne, dōó kīni o dé ña ne, ení ña ne, dōo vá'ā o dé ña.

¹³ Ñá ku kuntí'i ini nto, tā'an kó, tē ntaínchu'vi ña'a ñuxiví sa nto. ¹⁴ Ini o tsí xo'ō ne, ñá ní'í ka ko doxí'í san tsi e ní'í ko ntuvi vā'á iña kó ve. Kutuni ko sá'ā, tsí ntákuinima kó ta'an kō. Xoó ña'a é ña kákuinima í ta'an i ne, kuan tsí koo kuví ña ni kuétsí ña. ¹⁵ Xoó ña'a, ña é ña ntío kue'en tsí i ta'an í ne, vata kaa ña é kaē'ní ña'a kaa ña nuu Xuva ko. Ini nto tsí xoo ñá'a é kaē'ní ña ña'a ne, ña kúvi ní'í ñá ntuvi va'á iña ña ntii dañu ntúvi. ¹⁶ Kutuni ko nté koo kuinima ko, tsí Cristú ne, xé'e ña ntuvi iña ña é kuví ñá kuenta iña ko. Dukuan xo'ō dí ne, nakuē'e ó ntuvi iña ko kuenta iña ta'an kō. ¹⁷ Xoó ña'a e dōo iō iña ñá ne, kakutuni ña tsí iō ta'an kō, ña é kakunaá ntee í ne, te káde víí ini ña é kué'é ña ne, ¿mí'i ntū nuu é ntaā i é kákuinima ñá Xuva kō? ¹⁸ I'xá mīi ko, ñá te da mii tsí rki xaa ko kunteku é káka'an o tsi dōo kuinima kó Xuva kō, tsí na kuīnima ntí'xe ko ña né, na víi o é vá'á ni ta'an kō dí.

Koo ntaá iní kō nuu Xuva ko

¹⁹ Dukuān é kūtuni ko tsí xo'ō ne, ntántikin o é nuu é ntaā i. Dukuān ne, nakunuú ka'nu nima kó nuu Xuva ko. ²⁰ Tē ntáde kuení ko té ña vá'a nima kó ne, Xuva kō ne, ini ña nté o ntí'xe nima ko, tsi díí ka ka'nu ña ne, ini ña é un ntí'í. ²¹ Ntō'ó ta'an kó e dōo ntio kó, te iní o tsí ña tuvi kuétsi kō ne, ñá kūka'an nuu ko é xēe étsin o nūu Xuva ko. ²² Diví ña ne, ta'xi ña da neé ka nuu i é kákan o nta'a ña, tsi ntákuinti'xe ko tū'un é káka'an ñá ne, ntáde

ō nee iña e ntío ña. ²³ Sá'a kāka'an ña é vii o: é kuinti'xe ko l'xā ñá Jesucristú ne, kuinima ko ta'an ko, vatā ó kaka'an ña. ²⁴ Da xōó ka ña'a, ña é ntáde ntaa é kāka'an Xúva kō ne, ntákudadii ña ni Xuva kō. Nuú mé'ñu Xuva ko ñā di. Dukuān íni o tsí nuú mé'ñu Xuva ko kō, tsí e tá'xi ña Espíritū Sántū san é kunūu ña nima ko.

4

Espíritu Xuva ko ni ěspíritū ña é kāde ne'u iní i nī Cristu

¹ Ntō'o tá'ān kó e dóo ntio ko, ñá ku kuinti'xe nto da xōó ka ña'a, ña é kāka'an tsí kantikin ña tú'un Xuva kō. Koto nteé va'ā ntó ña vata koo é kūtuni ntó tē nuú é ntaā i é kantikin ñá Xuva kō. Tsí ña te da dí ñá vete ntaíka ña ñuxiví sa. ² Dukuān é kūtuni nto xoo é nūu Espíritu Xuva kō nima i: xoo é kāka'an i tsí nuú é ntaā í tsi kí'xi Jesucristu ñuxiví sa é nī'i ña kúnū é vata kaa ñatí san ne, kaduku ntée nti'xe ña Xuva kō. ³ Xoó ña'a é ña kuān ó kaka'an iña Jésuú ne, ñá kadūku ntée ña Xuva kō. Ña kuan ntāá san ne, kaduku ntée ña ña kainchu'ví Cristú san. É tēkú nto tsí kí'xi ña sa'á ne, é tuví ña ñuxiví sa vevii.

⁴ l'xá ko, ntáduku ntée nto Xuva kō ne, é kūvi ide ntó ni ña vete kuān ntāa san. Tsí ñi ña é nūu ña nima ntó ne, díi ka ka'nu ña é vata kaa é nūu nima ñá ntáduku ntée ñuxiví sa. ⁵ Ña ntáka'an dóveté san ne, da mii ñuxiví sa vé'xi ña. Nee iña e ntáka'an ñá ne, iña ñuxiví sa di ne, dukuān ntaíni ña ñuxiví sa ña. ⁶ Xo'ō ne, ntáduku ntée o Xúva ko. Xoó ña'a é ini ña Xúva kō ne, kaini ña tú'un kō. Xoó ña'a, ña é ña kaduku ntée Xuva kō ne, ñá kaíni ña tú'un kō. Dukuān ne, kutuni ko xoó kaka'an i é nuú é ntaā i, xoo é kāka'an í dovete.

E dóo kuínima Xúva ko kō

⁷ Ntō'o tá'ān ko e dóo ntio kó, na kuínima kó ta'an kō xé un xé un ō. Tsí Xuva kō tá'xi ña nté koo kuinima kó ta'an kō. Xoó ña'a é ini kuiníma ñá ta'an ña ne, i'xa é kāduku ntée Xuva ko ñā. Ini nti'xe ñá Xuva kō. ⁸ Xoó ña'a, ña é ña ini kuinima í ta'an í ne, ntē ñá ini ñá Xuva kō di. Tsí Xuva kō ne, dóo kuínima ña. ⁹ Nánē'e Xúva ko kō tsí dóo

kuínima ñá kō e táxnūu ña l'xá mii ña ñūxiví sa vata koo é nī'i ko ntuví va'á iña ko kuenta iña ña. ¹⁰ Dukuān né, kūtuni ko tsi dóo kuínima ñá kō, tsí kuān té ña ni kuiníma ko ña kídaā ne, di'na ña kuínima ñá kō ne, taxnūu ña l'xá ña vata koo e ntá'vi ña kuétsi kō da éti ña niñi ña kuénta iña ko.

¹¹ Ntō'o e dóo ntio kó ne, dōó kue'e kuínima Xúva ko kō ne, kuan koo na kuínima kó ta'an kō di. ¹² Xuva kō ne, nté uun ña'a vata kiní ña ña. Ntá tsi te kuínima kó ta'an kō ne, nuu mé'ñu Xuva ko kō. Kídaā ne, kuinima ntí'xe ko vatā ó kuinima Xúva ko kō. ¹³ Ini o tsí nuu mé'ñu Xuva ko kō ne, uun tsi kúvi o ni ñā, tsí e tá'xi ña Espíritu ñā é kūnuu mé'ñu kunuu dava ña kō. ¹⁴ Nti'í ne, iní nti ne, ntáka'án nti tsi táxnūu Xuva ko l'xā ñá vata koo é nakáku ña ña ntántoo ñuxiví sa. ¹⁵ Da xōó ka ña'a é kāka'an ña tsí Jesuú ne, l'xá mii Xuva ko ñā ne, nuu mé'ñu Xuva ko ñā ne, uun tsi kúvi ña ni Xuva kō.

¹⁶ Nti'í ne, é kūtuní nti ne, kakuinti'xe nti tsí Xuva kō né, dōo kuínima ñá kō. Dōó ini kuiníma Xúva kō. Xoó ña'a é ini kuiníma ñá ta'an ñá ne, uun tsi kúvi ña ni Xuva kō ne, nuu mé'ñu Xuva ko ñā. ¹⁷ Kuān koo kutú've kō é kuinima kué'en ko ta'an kō vata koo é ña u'ví ko tē xee ntúvi é ká'an Xúva ko xoo é vā'a í ne, xoo é ña vá'a i iña ñá ntántoo ñuxiví sa. Tsi é kutú've kō é kuínima ko ta'an ko ñuxiví sa vata o kuínima Xúva ko kō. ¹⁸ Xoó ña'a é ini kuiníma ñá ne, ñá kau'ví ña. Tē nuu é ntaā i é ini o é kakuinima ntí'xe kō ne, ña túvī nee iña é kau'vi ko. Dōó nto'o ko te kau'ví ko. Xoo é kau'ví í ne, váta kutūni vá'a i nté koo kuinima i.

¹⁹ Ini kuiníma kō, tsí di'na kuínima Xúva ko kō. ²⁰ Te iō ñá ne, kaka'an ña: “Kakuinimá ko Xuva kō”, ka'an ña, ntá tsi ña ntío kue'en ñá ta'an ña ne, koó dā dovete kaka'an ña. Tē ña kakuinima ñá ta'an ña é kainí ña ne, ¿nté ntu koo kuinima ñá Xuva kō, tsí vata kiní ña ña? ²¹ Xtúví Xuva ko tū'un sá'a é káda ntaa o: Xoó ña'a é kakuinima ñá Xuva kō ne, na kuínima ñá ta'an ña di.

5

Kuvi víi o ni ñūxiví sa

¹ Un ntíí ntíí ña'a ne, kuvi ña i'xá Xuva ko tē ntákuin-ti'xe ña tsí Jesuú ne, ña é taxnuu Xuva ko ñā. Xoó ña'a é kákuinima ña uva i'xá san ne, kakuinima ña i'xá ña ña. ² Dukuān né, tē ntákuinima kó Xuva kō né, tē ntáde ntaa o é káka'an ña ne, dukuān ne, ini ó tsi ntákuinima kó i'xá mii ña Jesuu. ³ Ntákuinima ntí'xe ko Xuva ko tē ntáde ntaa o é káka'an ña. Tū'un e xtúvi ña é káda ntaa o ne, ña te xido víi. ⁴ Tsí un ntíí ntíí ña'a, ña e kúvi i'xá Xuva kō ne, kuvi víi ña nī é un ntí'í nuú i é kīni kaa é ío ñuxiví sa. Kuvi víi o, tsi ntaínúu ini ko Xuva kō. ⁵ Xoó ña'a é kákuinti'xe i tsí Jesuú ne, i'xá Xuva ko ñā ne, kuvi víi ña nī é un ntí'í é kīni kaa é ío ñuxiví sa.

Nuu i e ntántada ntaa iña I'xá Xuva kō

⁶ Dā kí'xi Jesucristu ñuxiví sa ne, ntute san ni ñíí san xe' é kuenta. Ña te da mii tsi ntúte san, tsí ntute ni ñíí ña. Mii Espíritū Sántū san kantada ntaa ña nee iña é nuu é ntaā i iña Cristú ña. ⁷ Ntuní nuu i sá'a e ntántuntaa e dukún kán: Xuva ko nī ña é káka'an o Tū'un ña ni Espíritū Sántū. Ntuni sá'a ne, uun tsi ña'a kuvi. ⁸ Ío ka uni núu i ntántuntaa ñuxiví sa ña: Espíritū sán, ni ntúte sán, ni ñíí san. Ntuni núu i san ntántudadii. ⁹ Kuinti'xe ko tū'un é kántada ntaa ña'a san, ntá tsi tū'un é kántada ntaa Xúva kō ne, ña ka kue'e nuu á'vi i. Tsí kantada ntaa ña kuenta iña i'xá ña. ¹⁰ Xoo é kákuinti'xe i i'xá Xuva kō ne, nuu tū'un é nuu é ntaā í nima ña. Xoo é ña kakuinti'xe i Xuva kō ne, vata te káka'an ña tsí vete Xuva ko, tsí ña ni kuinti'xe ña é káka'an Xúva ko iña i'xá ña. ¹¹ Sá'a ne, tū'un é ntada ntaa Xúva kō: é tá'xi ña é kuntoo o ni ña ntii ña ña ntúví te kuinti'xe ko i'xá ña. ¹² Xoo e túvi ni'í i i'xá Xuva kō ne, e ni'í ña ntuvi vā'á iña ña nta'a Xúva kō. Xoo é ña tuvi ni'í i i'xá Xuva kō ne, ña túvi ntuvi vā'á iña i nta'a Xúva kō.

I'a ntí'í tū'un sa'a

¹³ Kade vá'a u sá'a iña nto, ña ntákuinti'xe i'xá Xuva kō, vata koo é kīni vá'a nto tsí e tá'xi Xuva kō é ni'í nto ntuvi vā'á iña nto ntii ña ña ntúví.

¹⁴ Ntaínúu ini ko Xuva kō, tsí ini o tsí katekú ña da ntaíkan o da nēé ka nuu i nta'a ña, vatā o ntío ña. ¹⁵ Te ini o tsí katekú ña é kākā'an ntá'ví ō ne, ini o tsí ta'xi ntí'xe ña da nēé ka nuu i é kākan o nta'a ña.

¹⁶ Xoó ña'a é ini ña tsí kade ta'an ña é kīni kaa, uun kuetsi é ña kaxé'e doxi'í san ne, ka'an ntá'ví ñá kuenta iña ta'an ña. Kidāā ne, kué'e Xuva ko ntūvi iña ta'an ñá, tē ña te kuétsi kā'nu é kāxe'e doxi'í san. Tsí ió uun kuetsi é kāxe'e doxi'í san. Nā te kākā'án u te ka'an nta'ví nto kuenta iña i sá'a. ¹⁷ Vata dá kade o é kini kaa ne, ió kuetsi kō. Ntá tsi ña te un ntíí ntíí kuétsi san kaxé'e doxi'í san.

¹⁸ Ini o tsí xoo ñá'a é nakáku ña nta'a Xuva kō ne, ñá ncho vií ka ña é kīni kaa. Tsí l'xá mii Xuva kō ne, kade ña ña kuenta. Nā túvi nēe nuu i é kīni kaa é kūvi vii ka é ña vá'ā san ni ña. ¹⁹ Ini o tsí xo'ō ne, ntáduku ntée o Xuva kō. Ntá tsi ña ntáduku ntée ñuxiví kini kaa sá ne, da mií e ntáde ña é kākā'an tó'ō e ña vá'ā san. ²⁰ Ini o tsi e xée l'xá Xuva kō ne, tā'xi ña é kūtuni ko xoo é Xuva nti'xe kō. É ntuvi uun tsi o ni ñā é Xuva nti'xe kō, ni l'xā ñá Jesucristu. Divi ñā é Xuva nti'xe kō né, kata'xi ña ntuvi vā'á iña ko ntii dañu ntūvi. ²¹ l'xá mii kó, kuenta vií nto é ña kunuu iní nto xoo é ña te Xuva ntí'xe kō. Sá'a tsí é kākā'án u ni ntō.

Tū'ún xuva kō vatā ó ntáka'an ña ñuú Coatzospan
New Testament in Mixtec, Coatzospan (MX:miz:Mixtec, Coatzospan)
copyright © 2003 Wycliffe Bible Translators, Inc.

Language: Mixtec, Coatzospan

Translation by: Wycliffe Bible Translators, Inc.

Copyright Information

© 2003, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Coatzospan

© 2003, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

